

四庫全書

集部

欽定四庫全書

元豐類藁卷四十三

宋 曾鞏 撰

誌銘

都官員外郎胥君墓誌銘

君姓胥氏諱元衡字平叔長沙人皇考諱某王考諱某
考諱某王考贈尚書工部郎中考為翰林學士尚書工
部郎中贈尚書吏部侍郎君少以蔭為將作監主簿六

遷為殿中丞賜緋魚袋鎖廳應進士舉得出身又三遷
為尚書都官員外郎歷監在京染院內衣庫皮角庫簽
書河南府判官公事通判湖州又通判海州治平三年
四月壬寅以疾卒於泗州其年八月庚寅葬於許州陽
翟縣三封原翰林君之塋初娶李氏太子少傅若谷之
女再娶韓氏封成安縣君尚書刑部員外郎知制誥綜
之女子男二人曰茂諱太廟室長次尚幼女二人長早
夭君少孤能自奮厲力學問工為文章又謹畏廉潔慕

善而不自放居官雖小法未嘗不慎而不為察察於人
有所能容其大意如此故所至士大夫愛其脩而百姓
歸其恕其在染院二庫雖尚少已有能名及為通判判
官而能益顯蓋所試者大將豈可勝數哉始大臣薦其
文章宜在館閣近臣又薦其脩潔宜任御史朝廷方嚮
用之以為江西轉運判官命始下而君蓋已死矣死時
年三十有九聞其喪者識與不識皆哀之蓋天聖之間
翰林君方處顯好收獎天下之士而名能知人士之出

於其時有盛名於天下者多翰林君發之及其後君既壯大所與遊士大夫亦皆一時之雋然自天聖至於今纔四十年翰林君之門下士多至大官富貴尊寵君所與遊士大夫亦多重於時而翰林君弃賓客已久君又蚤世獨翰林君之夫人建康郡太君田氏年七十與君之孥羈旅於閭巷君之喪合衆人之賻乃克葬其盛衰之際如此固所謂命者非耶君之葬祕閣校理裴煜以茂謚之疏來請銘予與君皆嘉祐二年進士故不得辭

銘曰

維艱而勤以敏其繼維平而畏以篤其義考已無遺在人
有賜我志之良孰曰非遂我材之尤孰曰非試不申其期
不擴其施有命則然其又何悲尚告後世知者之辭

劉伯聲墓誌銘

慶厯之間余家撫州州掾張文叔與其內弟劉伯聲從予遊
余與伯聲皆罕與人接得頗意以學問磨礪浸灌

為事居三年迺別後數年余以貧而仕見伯聲於京師
年益壯學日以益又數年余校書史館伯聲數過余飲
酒談笑道舊故相樂也伯聲未老然以疾故亦衰矣既
而余去京師而東更七州至于亳伯聲子之美來告曰
伯聲死八年矣將死時命之美屬余銘其言曰葬而不
得余銘如不葬也余惟伯聲始從余遊至今三十年見
其少壯至於有疾而衰與之故最久於其死而托銘於
余故不得而辭也伯聲諱震為人質厚沉深寡言笑恂

恂蹈規矩與人遊見其一善若恐不能及見其一失若
恐不能拔其篤於誼如此讀書有大志慨然欲有為者
也少孤能自立尤貧然營疏屬之葬孤姪之嫁娶忘其
力之不足也數以進士薦於鄉卒不合晚乃得試將作
監主簿曾大父澤左補闕贈吏部尚書大父居仁單州
單父縣主簿考紘濟州司理參軍其先清河人自吏部
葬開封府之東明今為東明人伯聲卒於熙寧五年二
月戊戌年五十有三葬於東明之陽山鄉曰駒里以元

豐三年十一月某甲子妻賈氏尚書比部員外郎式之
女子四人之美之純之奇之邵二女嫁倪良器李日新
張文叔名彥博余為之叙其文者也銘曰

敏於求已尚行寡言篤於求古廣見多聞有既畀之而
施則屯維舊則信以諗後人

尚書比部員外郎李君墓誌銘

康定初先人寓南康與李君居並舍是時君年未及四
十游余父子間相好也後十餘歲君為臨安遇余於浙

西道舊故喜甚又十餘歲君已退而家居復見之山陽
又九歲而君年七十有一以卒明年其孤仲熊自山陽
抵京師拜且泣曰願得銘也余惟君游余父子間四十
年矣銘其可辭君姓李氏諱丕字子京初名真卿曾大
父諱某大父諱某考諱某贈光祿卿母丁氏仙源縣太
君繼母王氏仁壽縣太君海州朐山人家故寒也學為
士自君始出舉進士中其科得主楚之淮陰簿歲凶轉
運使調軍食用君主宿州糴他州皆強賦民猶不足君

隨便開誘糶者悅趨糶最他州去為虔州司法參軍能
隨用見聲出衆上薦者十四人不用遷寧國軍節度掌
書記轉運使屬君市翎毛擾致如主糶所市以赤數之
至十萬復最他州又屬君主作院君考校程度所作兵
器總一萬一千三百二十有四皆精且利他軍州事有
不能決者多屬君君所決者二十有八事蓋復太平州
囚管壽活之明通判歙州林瑀無罪釋之類如此於是
能益白薦者十三人遷祕書著作佐郎用薦者監興元

府稅急吏寬商課贏十有七萬歲中以歲次遷祕書丞
以課遷太常博士以覃恩遷尚書屯田員外郎知杭州
臨安縣召為審刑院詳議官賜緋衣銀魚遷尚書都官
員外郎通判蜀州蜀少事然他州訟有積歲不能決者
轉運使以屬君君所決八事民信服之遷尚書職方員
外郎監在京內衣庫樞密使田況奏用君刪定馬軍司
條貫既成詔加賞賚濱州有獄久不能決辭連大臣家
子遣吏治之輒辭詔遣君乃決累遷尚書職方郎中以

母老出通判杭州坐法免復為尚書比部郎中監沂州承縣鹽酒稅未逾月自罷歸又監陝州集津梁鹽務不行以本官致仕元豐三年九月己卯以疾卒山陽之私第十一月甲寅葬安樂鄉之楊興里君娶葛氏仙居縣君再娶喬氏壽安縣君子男七人曰仲熊衛州軍事推官曰仲謨以進士再試禮部曰仲將曰仲傑曰仲倩曰仲昌皆未仕也女六人嫁吳好禮子銳皆奉議郎馬察子鏜皆進士餘幼也君既自奮拔立其家蓋仕四方惟

蜀去其親其事兄撫孤弟姪皆盡恩意其為吏不獨能
自任其官蓋他吏之不能任其事者或屬君兼任之辦
且裕也不幸一跌世無力振達之者故以坎壈終銘曰
海區氏李有啟厥世富辭與能自約而侈曰父與子郎
官卿士曰妻及母翟衣象掃謂勢方利孰輻以毀施不
盡有故也則喟尚佑爾裔以追厥始

司封員外郎蔡公墓誌銘

公諱充字公度天聖二年進士及第為邵武軍之邵武

尉又為應天府之下邑尉丁母夫人河間縣太君周氏憂服除為越州司理參軍天平軍節度掌書記遷秘書省著作佐郎知洪州奉新縣秘書丞知遂州小溪縣改通判戎州累遷太常博士尚書屯田度支司封員外郎歷監在京都進奏院羣牧判官知絳州又為提點荊湖北路刑獄公事至和三年七月二十三日以疾卒於澧州之官舍享年七十有一嘉祐二年十一月十三日葬於建昌軍南城縣太平鄉之西原公為人好自潔清平

居衣冠容貌肅然及其臨事以沈默慎靜為主故自起家至於其終凡三十餘年歷內外官任事無纖芥之失其與人遊始若淡然無足動其意者及其久人人皆退自喜謂公真長者也其為尉參軍掌書記人始以廉節知公及為奉新小溪絳州其政又以平恕不擾聞至其在羣牧荆湖數更置諸事人皆服其能其於越州屬將佐交惡府中多向背公獨挺立無所與後將又以貪坐法官屬多不能自全事亦卒無汙公者於戎州屬瀘州

叛蠻攻清井監轉運使用公調兵食禦之兵遂以濟於絳州州歲市羊數萬供京師公奏減之至今賴其法於荆湖既周知官屬善惡於善人多薦籍成就之而於惡人無所貸其法公既能自將顯其材故薦公者尤多蓋王沂公曾王鄧公詒永與今富丞相弼之居鄆也皆薦之而鄧公之為樞密使兼羣牧制置使也又奏公為判官其為當世之大臣所知如此初公年十三喪父家貧尤自克苦養其母及仕未嘗廣田宅喪歸借屋以居曾

祖諱恭祖諱道隆父諱旦以公恩贈尚書屯田員外郎
世家南城故為南城人娶鄭氏累封宋城縣君子八人
曰冠卿秘書省著作佐郎曰端卿鄭州原武尉曰文卿
曰徽卿曰宋卿曰喬卿曰子卿曰孺卿公歿詔官其一
子蓋公不獨能以其有施於身又能力以其餘教於家
故公之歿也冠卿以材尤知名端卿而下皆謹嚴能世
其家者也女二人嫁邵武尉陳涉進士陳之邵冠卿等
將葬公以銘屬公故人子曾鞏銘曰

司封抱能屈初齡秉旄懷紱晚始亨沙墟莽厓肆經營
馬羊茁肥獄訟平凜然氣志潔以清自微訖隆用兢兢
風流餘徽被家庭子多有才後方興

贈職方員外郎蘇君墓誌銘

熙寧元年春余之同年友趙郡蘇軾自蜀以書至京師
謂余曰軾之大父行甚高而不為世用故不能自見於
天下然古之人亦不必皆能自見而卒有傳於後者以
世有發明之者耳故軾之先人嘗疏其事蓋將屬銘於

子而不幸不得就其志軾何敢廢焉子其為我銘之余
為之記其說曰君諱序字仲先眉州眉山人其先蓋趙
郡樂城人也曾大父鉞大父祐父杲三世皆不仕而行
義聞於鄉里祐生於唐季而卒於周顯德之間嘗以事
至成都遇道士異之屏人謂曰吾術能變化百物將以
授子祐辭不願道士笑曰是果有以過人矣而杲始以
好施顯名君讀書務知大義為詩務達其志而已詩多
至千餘篇為人疎達自信持之以謙輕財好施急人之

病孜孜若不及歲凶賣田以賑其鄰里鄉黨至熟人將
償之君辭不受以是至數破其業厄於飢寒然未嘗以
為悔而好施益甚遇人無疎密一與之傾盖無疑礙或
欺而侮之君亦不變人莫測其意也李順叛攻眉州君
居園中守禦會其父病沒君治喪執禮盡哀退慰安其
母皆不失所宜慶厯初詔州縣立學取士爭欲執事學
中君獨戒其子孫退避人皆服其行蜀自五代之亂學
者衰少又安其鄉里皆不願出仕君獨教其子渙受學

所以成就之者甚備至渙以進士起家蜀人榮之意始
大變皆喜受學及其後眉之學者至千餘人蓋自蘇氏
始而君之季子洵壯猶不知書君亦不强之謂人曰是
非憂其不學者也既而洵果奮發力學與其子軾輒皆
以文學名天下為學者所宗蓋雖不用於世而見於家
稱於鄉里者如此是不可以無誌也已君始以子恩為
大理評事後累贈尚書職方員外郎享年七十有五慶
厯五年五月十一日終於家八年二月某日葬於眉山

縣脩文鄉安道里先塋之側夫人史氏蓬萊縣太君二
子曰渙尚書都官郎中提點利州路刑獄公事有能名
曰洵霸州文安縣主簿編纂太常禮書贈光祿寺丞孫
七人位侑不欺不疑不危軾轍軾殿中丞直史館轍商
州軍事推官銘曰

蘇氏徂西值蜀崩分三世高逝以篤吾仁君始不羈勞
躬以卑孝於父母施及窮黎維見之卓教其子孫終化
鄉邦學者詵詵維子若孫同時三人擅名文章震動四

方迺本厥初考祖之自刻詩墓石以畀厥裔

庫部員外郎知臨江軍范君墓誌銘

嘉祐五年六月辛巳尚書庫部員外郎知臨江軍事范君卒於位年五十有三其年十月辛酉葬於江州德化縣之仁貴鄉萬家山前葬其孤屬君之故人李中考次君之官氏邑里與其功行之實為狀授使者使告於輦曰先君葬既得日月宜有銘孤安期也敢請輦曰君之行宜有述乃為之誌其墓而銘之其敘曰惟范氏傳敘

受姓自劉累以來其後居江州者出於晉豫章太守甯
之後君諱端字思道江州德化人也祖祕書省著作佐
郎贈太常少卿諱成象父尚書都官員外郎贈光祿卿
諱應辰君始以父任為太廟齋郎累轉至尚書庫部員
外郎歷德化尉江寧主簿江都令知南昌飛烏彭山三
縣通判通州徙泰州又為勾當開治畿內溝洫提舉陝
西河北路便糴糧草至知臨江軍事而飛烏以乞養太
夫人得監江寧府鹽稅彭山用薦者得監雲安軍鹽井

二縣皆不至君聚書萬餘卷強力篤學為人恭遜質儉
能自修飭門內之治肅如也及施於為政以謹法能持
廉名於世而世之能觀其內者亦少也始為江都會歲
旱張若谷為揚州遣吏數人與君皆出視民田他吏還
者白歲善君還獨白田實旱若谷初不是之也君持旱
苗力爭乃卒是君所白吳遵路蔣堂為淮南轉運使使
君護河役君往視之還言河不可為遂罷君用他吏護
役而河果不可為三人者其初皆怒已乃感悟共薦之

而當是之時天下之主財利者方務於急聚歛治民者以立聲威為賢交四方之賓客者又往往嚮意於卑辭貌煩饗燕贈送之禮以其故能傾士大夫以干天下之譽君乃獨推息民教化之意以簡易自守故為雲安主鹽利而議蠲鹽課以數萬為臨江以興學教人為先而廚傳賓客之奉十去其七八四方之往來者或出語訕君君不為之動也其正行直道如此太夫人李氏贊皇縣太君父尚書工部侍郎虛已元配某父龍圖閣直學

士向次配周氏清河縣君父尚書司封員外郎陵子男
六人安期安仁安之安常安壽安禮女五人長適和州
司戶參軍鄭夷中次適都昌主簿周詠次適郊社
齋郎周佺期餘尚幼孫男六人萃叟岩叟渭叟商叟蒙
叟真叟太夫人之歿君哀感疾四年乃能起凡君之所
既立可謂有士君子之行非耶自不遵先王養士用人
之法而士在閭巷之間者用力於空文居朝廷者馳騁
於虛名以譁世取寵士之能修其內潔身累行者非自

好之篤莫能至而世亦罕能知之也故君之事予喜為之
見於文使後之君子得覽焉君於文章尤長於詩有集
三卷藏於家其銘曰

君性溫溫好退持卑及其臨事擇義而為一世之棄君
獨從之一世之慕君獨違之行已有常在官無疵曷以
知之眎此銘詩

張久中墓誌銘

君姓張氏名持字久中初名伯虎慶厯三年來自曲江

入太學當是時天子方詔學官歲獻士二人學者以數
百千人獨獻君會學散不報於是時予蓋未嘗識君也
後二年過予之所居臨川始識之君為人深沈有大度
喜氣節重交游一時所與之遊者甚衆而君所尤稱者
廣漢張賁以為年少可進以學者莆陽陳惇蓋君之學
多賁發之而於惇以師友自處也凡君之與人交喜窮
盡其得失其義足以正之而其直未嘗苟止也至其與
衆人接尤溫以莊不妄與之言與之言必隨其材智所

到不病以其所不為故君之友皆憚其嚴而喜其相與之盡衆人之得君遊者亦皆喜愛而未嘗有失其意者其語曰士生於今勢不足以持世而遊於其間當如此也於臨川出其文章因與予言古今治亂是非之理至於為心持身得失之際於其義余不能損益也後二年死於興國軍某月某日也明年其弟來江南以力之不能將獨負君之骨以歸是時陳惇方以進士得出身約君之弟曰吾恐不全歸吾友耶明年吾得補為吏力能

以君之樞歸其弟乃止君年若干祖某考某君幼孤養
於兄嫂嘗曰嫂之於吾猶母也婦能以姑之禮事吾嫂
者可以為吾婦矣然卒亦無也君固難交然不易其好
而陳惇者與君交尤深也予嘗眎惇與君之相從憂窮
齟齬無不共之其中心豈有利然也世之交友道廢久
矣其有之或非此也然則君之事其有取於世教非邪
惇以某年某月某日歸君之葬地而屬予銘其辭曰
嗚呼久中不如其志孔孟已然何獨於子生而不大天

固為之其長在人於此觀之

秘書丞知成都府雙流縣事周君墓誌銘

君姓周氏諱旻字夢臣衢州江山人也曾祖漢規祖德厚父幹君以進士及第歷南劍之將樂建昌軍之南城主簿監虔州雩都銀場又為泰州司戶參軍用薦者為秘書省著作佐郎知宣州南陵縣事遷秘書丞知成都府雙流縣事嘉祐六年正月某甲子至江陵卒於舟中年五十有一母某氏先娶毛氏又娶祝氏子男三人曰

某曰某女四人君之卒某始七歲清江李中為之具喪事所須某年某月某甲子君之弟曷葬君於某縣某鄉某所之原君少孤力學不問生業事母以孝稱在仕也嫁姊之貧者居常分月俸三之一以奉之餘以與諸弟君與妻子或止食館券而已為人和平質簡其施於為政亦然及至有所必行人亦多所不能及也其為南城雩都取豪猾尤難治者三人皆繩以法君既見惡果於繩而去之故其餘皆斂跡不敢犯君法此君之行已居

官已試者也所試者大將豈止於是歟銘曰

婉婉為人嶷嶷為吏此有愛慕彼無怨議孰厚其有孰
艱厥施維銘昭之以諗來裔

元豐類藁卷四十三

欽定四庫全書

元豐類藁卷四十四

宋 曾鞏 撰

誌銘

殿中丞致仕王君墓誌銘

君諱某字某其先琅邪人嘗徙家于蜀至君之考又徙家于揚故今為揚之江都人曾祖諱錫祖諱得中為真定府獲鹿縣令贈尚書刑部侍郎考諱汝能為尚書都

官郎中贈尚書工部侍郎君少以父仕為太廟齋郎養其父不忍一日去左右至卒喪年已四十餘始出為南劍州司戶參軍歷監劍州銀銅場和州司戶參軍用薦者監潁州稅去為越州山陰縣尉滑峒錄事參軍隨州唐城縣令其為銀銅場治者復業而歲課大溢為尉能發奸偷為錄事能治獄不撓為令能有惠愛於人其試於事者如此其為人居家孝友遇人和易質厚不為聰明機巧以譁世動俗故知之者少而君亦自若也至年

七十遂上書還政遷太子中舍今上即位恩遷殿中丞
賜緋衣銀魚卒於熙寧五年之五月甲辰年七十有七
以其年十月乙酉葬于江都之東興寧鄉馬坊里以其
配永嘉縣君周氏祔有子二人曰幾大理寺丞曰深潤
州丹徒縣主簿皆有文行能世其家有女一人嫁陸氏
有孫男二人孫女二人尚幼也寺丞娶余之仲妹以書
來乞君之墓銘余不能辭也銘曰

養心以和動已以直不為世巧安於自得顯不在躬實

詔爾子欲鴻厥聲勒銘於此

贈大理寺丞致仕杜君墓誌銘

君姓杜氏澶州濮陽人卒於皇祐元年十月庚申葬於
熙寧八年十月丁酉其墓在濮陽縣桂枝里之藥村以
夫人僊居縣太君潘氏祔君曾王考佑王考延嗣考珣
子男三人曰言曰宗諫皆蚤世曰宗誨殿中丞女二人
嫁馬氏藥氏孫男二人曰良輔餘未名也君諱瑩字德
溫贈大理評事又贈大理寺丞為人孝友溫良以清靜

為學而以淡泊自足行修於家而譽聞於鄉其自得者
壽考見於身其有餘者流澤見於後故其年至於八十
而有子能大其門言理之士以此多君也宗誨為人質
厚恬夷世俗之所為有不為者余為襄陽宗誨實僉書
節度判官公事愛其所守而知其有所受也其以君之
銘乞於余故不辭銘曰

有以養其內克遐者壽有以行於遠克昌者後帝原厥
初追錫命書余與此銘賁于幽

胡君墓誌銘

君名敏生於天禧之戊午卒時皇祐之辛卯也既卒之
明年葬於其所家撫州金谿縣之東某里某原字某姓
胡氏父名晏教君學已為之求師又為之求四方善人
君子與之接致其力不敢懈至於老以死不敢變君亦
能奉其意故君之為進士其強學其廣記其博問其能
文辭於其業可以謂之修其事親其居家與人遊不見
其缺虧其約其質其不苟其寡言於其行可以謂之修

夫積其勤以至於業之修而止薦於鄉積其謹以至於行之修而不克顯於世此世之所以哀君也然君有可以慰其親而不疚於其內比於得其欲富貴於一時而有愧於其心者其得失何如固易知也母某氏妻某氏子某弟某君嘗學於余也故銘之銘曰

慰其親學也勤短而屯塞不伸震無垠琢斯珉

光祿寺丞通判太平州吳君墓誌銘

龍圖閣直學士給事中吳仲庶具書載其子業官世行

治屬余曰吾子某不克壽不得見其志幸得名信後世則某其不泯泯尚足以慰吾思也余為之述曰維吳氏以文學直道繼有顯人其家子晚出並茂亦多以材能見於世君居其間孝友篤學有大志未見其止其不幸蚤死故君既自重無所試而其家蓋識君之事亦略也君以父任守將作監主簿令上即位恩遷太常寺奉禮郎是歲進士及第僉書廣濟軍判官公事上書言時事有人之所難言者部多盜君請取酒場羨錢益賞購轉

運使難其言君以聞詔用君議盜以衰息君以母濟陽
郡君蔡氏憂去官服除遷光祿寺丞通判太平州州賴
以治行部中視河還不入其家將行廣濟圩度姑熟溪
橋壞以水死年三十有三熙寧八年四月某甲子也朝
廷聞而官其一子君娶陳氏尚書職方員外郎亢之女
前君一年死子曰塤郊社齋郎曰圻未仕女一人始五
歲君初名東禮字子鈞其先興國軍某人曾祖考某祖
考某贈戶部尚書仲庶名中復以君卒之二年正月某

甲子葬君南康軍都昌縣沐浴保之龍回山以陳氏祔
銘曰

家紀其行官紀其能收科于少是紹是承維曰未試方
勃而起云胡不遐一跌而逝命則誰為昧不可稽畀爾
萬年式諡以辭

殿中丞監揚州稅徐君墓誌銘

唐之亡疆者分其地為國以十數楊行密有淮南稱吳
海州人徐溫為吳將有功行密死三子相次立溫用事

貴顯溫死其養子知誥遂代楊氏盡有江淮之地稱唐
去溫所與為姓名者姓李氏名昇溫已子知諫事昇為
將死昇追以為中書令臨淄王知諫子遜事昇子璟為
中書侍郎上饒郡公遜子徐君事璟子煜為其秘書郎
賜緋魚袋宋既受命平天下俘李氏以歸徐君亦隨之
京師得為太常寺大祝不樂棄官歸江南久之為殿中
丞監楊州稅以死子天錫為秘書丞亦死女四人其第
二女與季皆嫁呂氏徐君死祥符間後四十餘年嫁呂

氏女有子倚始葬徐君與徐君之母李氏妻陸氏於楊州之某原方徐氏之先與楊氏俱起東南收其土地而有之遭行密子弱徐氏實任其國至昇遂代吳而徐氏子孫亦皆據士民之上有王公之勢於其一時富貴之際豈非盛哉百年之後其世凌遲至於徐君遂死而無以葬葬於異姓之孫盛衰之變何其速也然自前世無不皆若此富貴之不可以久恃亦何必異也而世之不安其命者方枉義挈挈以覬幸其偶得之者又惴惴恐

失之是真可以常處也哉初東南之地既入於有司天子憐士民許皆復田其故所有地徐君之地為尤多多不取有冒徐君之地以賣之者亦不問是以其貧甚而徐君獨自得徐君諱元榆字僊材好學善屬文吏部賈黃中嘗試其書判曰元白不足多也尤能詩詩數百篇號南歸集大抵多慨其不得志徐君之所以自見也嫁呂氏女之夫名某憐徐君之死無以葬死以屬其子倚倚貧甚能自力卒葬徐君而就其父志銘曰

富吾不爭可謂既好之貧吾不慙可謂又安之諧歸此
丘女子之為永昭厥聲維此銘詩

永州軍事推官孫君墓誌銘

黔縣之孫氏有起進士為尚書工部郎中廣南西路轉
運使以卒者諱杭以文學見於世其葬在黔之上林有
子亦起進士為永州推官以卒卒時年二十有八者諱
適亦以文學見稱葬在其父之左將葬其弟邈以告而
乞銘於南豐曾鞏其序曰孫氏世家富春唐有徙歙之

黟縣者諱師睦始自別為黟縣之孫氏師睦生延緒延緒生旦旦生遂良以子恩為尚書職方員外郎職方生工部工部實生君君年十有四辭親學問江東已有聞於人往從臨川王安石受學安石稱之後主越州上虞簿去以父恩得永州父卒萬里致喪疾不忍廢事既葬攜扶幼老將就食淮南疾益革遂卒於池州大安鎮實至和二年始工部為御史不合而出及使南方仆且起遽卒君尤自力學行謂蘊必發其在君又止此君於學

問好其治亂得失之說不狃近卑於為文以古為歸不
夸以浮雖素羸不廢書雖進不忘以止既肆而通矣而
不得極其志其銘曰

孫世來黜拔身艱故為世聞家始自工部工部孰有有
書百篇永州之學自其父傳其果以力其敏以明內有
其質外以華英再以不就其後當侈君不有子君多兄
弟

尚書都官員外郎王公墓誌銘

王氏其先太原人世久遷徙而今家撫州之臨川公諱益字舜良曾祖諱某不仕祖諱某以子故贈尚書職方員外郎考諱某以公故即其家拜衛尉寺丞公祥符八年舉進士及第初為建安主簿時尚少縣人頗易之及觀公所為乃皆大畏服其督賦稅未嘗急貧民或有所笞罰唯豪劇吏耳以故建安人尤愛之嘗病闔縣為祠禱改臨江軍判官軍多諸豪大姓之家以財力自肆而二千石亦有所挾為不法吏乘其然乾沒無所忌公至

以義折正二千石使不能有所縱以明憚吏使不敢動
搖居頃之部中肅然諸豪大吏見公皆側目而視至以
鄙言目公曰是不可欺也卒不得已以他計出公領新
淦縣縣以治聞去改大理寺丞知廬陵縣又改殿中丞
知新繁縣縣有宿奸數人公既繩以法其餘一以恩信
遇之嘗踰月不答一人知韶州改太常博士尚書屯田
員外郎嶺以南素習於夷無男女之別日浸月滋為吏
者師耳目謂俗止如此凡姦事雖得有可已者皆不究

公曰夫所謂因其俗豈謂是耶居郡求姦事最急苟有萌孽一切撻發窮治之屬縣翁源多虎公教捕之令欲媚公言虎自死者五輿之致州為頌以獻公使歸之曰政在德不在異州有屯兵五百人代者久不至欲謀為變事覺一郡皆駭公不為動獨取其首五人即日斷流之或請以付獄公不聽既而聞其徒曰若五人者繫獄當夜刼之然後衆乃服韶居南方雖小州然獄訟最多號難治公既以才能治之有餘遂以無事又因民之暇

時為之理營驛表坊市道巷使皆可以久遠為後利歸
丁衛尉府君憂服除通判江寧府改都官員外郎二千
石常以事倚公公亦為之盡寶元元年二月二十三日
以疾卒於官享年四十六母謝氏封永安縣君娶徐氏
又娶吳氏封長壽縣君子男七人曰安仁曰安道曰安
石曰安國曰安世曰安禮曰安上女一人嫁張氏處者
三人安石今為大理評事知鄯縣慶歷七年十一月上
書乞告葬公明年某月詔曰可遂以其月某日與其昆

弟奉公之喪葬江寧府之某縣某處吾嘗聞鄉里長老
言公為人倜儻有大志在外當事輒可否矯矯不可撓
及退歸其家斂色下氣致孝於父母致愛於族人之間
委曲順承一以恩自克位不滿其意故在外之所施用
者見於小而已今吾所書是也其大可知則家行最篤
已先人嘗從公遊其言亦然而吾又與安石友故得知
公事最詳其將葬也使者以安石之述與書來請銘遂
為之銘其尤可哀者也

公堂有母老不覺哀公庭有子仁孝而才世所可喜公
兩棄之莫不皆死公有餘悲

衛尉寺丞致仕金君墓誌銘

今上皇祐二年祀明堂推恩羣臣祕書丞金君得以其
父為大理評事致仕五年郊金君為太常博士又得以
其父為衛尉寺丞惟衛尉府君諱某字溫叟浮梁人初
君之考贈大理評事諱某有三子伯曰鼎臣為某軍節
度掌書記仲曰汝臣為太常博士季即君兄弟俱舉進

士書記與仲既起家君因不復肯就舉曰吾兄弟不可俱去吾親也後三十餘年卒以有子為丞云君有四子曰君著曰君佐曰君卿博士也曰君佑兄弟又皆舉進士博士既有名秩于朝三子皆復養於家蓋其父子兄弟之出處如此何其相似也當是時宋興已百年博士方以材自起於賤貧欲以其所為為天下慨然有志者也君獨自得於大山長谷之間日從子孫來四方之客與夫鄉人之老詩書樽席之側嘯歌息偃以忘其年賸

然遂其志者也遭天子既宗祀明堂顧朝士大夫皆褒
崇其親欲以風示天下命書寵章降於其家顯榮一時
壽考康寧有孫有曾以承以翼何其祥也君為人簡易
無町畦能事父兄衣食奉養自與者嘗取其薄嘗有盜
其牛羊已又盜其所乘馬者君知之皆不校盜卒自悔
以伏蓋君之質與其恕又有足多者如是也生於淳化
之庚寅卒於嘉祐之丁酉遺命三月而葬徙薄遂以其
年十二月四日葬於饒州浮梁縣萬戶山之前夫人徐

氏累贈壽安縣君君之歿也有子四人女六人孫男九人女十二人曾孫男三人女二人金氏或曰出少昊金天氏或曰出漢侍中稔侯傳至孫則亡至曾孫復侯而稔侯有弟倫倫子若孫四世六人皆侍中以忠孝名尊顯於世世稱金氏云至君之先皆家京兆唐僖宗時有今浮梁者遭黃巢亂徙人築險自保所活人以數萬因留治之凡十有七年遂家浮梁以功至檢校尚書右僕射昭信軍節度使諱某君曾祖也子諱某君祖也博士

以君之外孫尚書屯田員外郎臧論道之狀來屬曰子
為我銘吾親吾死足矣輦不敢辭銘曰

卑少恭老惟物之常即強棄父廼理之亡帝用慨然尊
祀明堂顧褒耄壽風示九有君勢之亨與享其榮擁笏
魏巾於家以息有子有孫嚴嚴我側志無不得君子之
祥銘以發之君子之光

撫州金谿縣主簿徐洪墓誌銘

嘉祐元年虔州安遠關縣令建安徐洪以撫州金谿主

簿攝安遠事明年八月十一日死安遠十二月其父尚
書屯田郎中舉以書告君之故人南豐曾鞏曰子為我
銘洪之墓遂考次君世序行已歷官卒葬之終始銘於
其墓曰君曾大父某某官大父某某官君字孺興為人
有大志讀書好其治亂得失之大旨為文長於辨說其
奔放馳騁上下反復之際有足壯也未冠聲號聞四方
初中進士除洪州司戶參軍不就退居大江之南好個
儻非常之奇節不肯少屈於人居八年以父命始強出

為主簿非其好也君居家遇人無親疎豁如也樂赴人之急為主簿不以非其好故怠其意其治能有愛於人金谿富人銅山林之利數十年君始奪之而縣之貧人賴其利益君之所試者小其為日又近而其所既立如是也享年三十有二死之若干日葬饒州鄱陽東門外母某氏某縣君妻凌氏黃氏男一人曰還孫始二歲女四人尚幼也銘曰

嗚呼孺興志果而大不勝于柔以室其外不隕其剛以

亨于內胡短其施而多其與父老失子兒嬰失父維銘
告哀以納于墓

太子右司禦率府副率致仕沈君墓誌銘

君諱某字某姓沈氏沈氏自齊太子家令約家於吳興
故世為吳興人至君之大父諱某考諱某始自吳興之
東林徙家於錢塘故今為錢塘人君以宗室密州觀察
使宗旦恩即其家得為太子右清道率府副率致仕又
以祀明堂恩遷太子右司禦率府副率兼官檢校國子

祭酒兼監察御史階銀青光祿大夫勳武騎尉蓋密州
觀察使宗旦者今天子之姪潞王之孫而其母夫人蓋
君之姪也君為人質樸無外飾其居鄉閭寬然長者也
其事父兄能力以嚴眎族人能愛以均雖饒財為大家
而衣服飲食自與尤寡約至人有急歸我則推財赴之
無錙銖顧惜意隣里或歲饑輒發倉以救人有欺其財
者皆不校既老治其家事不肯懈曰吾先人之所以付
我也處其子孫不以逸曰所以使汝守吾先人之法也

嘉祐二年三月一日以疾卒於家享年七十有六其年十一月十五日葬錢塘之西城初娶吳氏再娶車氏某縣君其葬也吳氏實從子三人曰暄曰晄曰時孫八人曰沔曰溱曰沂曰淑曰灌曰湜曰漸曰渥曾孫三人曰師楊曰師荀曰師軻時沔沂皆舉進士餘亦皆有學行蓋君之教也銘曰

赫赫宗子保藩于家天子曰嘻汝惟沈出予假汝寵錫其外親東宮之屬有長衛軍命君子家俾休其老以偃

以側服章華好天子命我匪我有求隕然順退媚于林
丘不蘊為機不阻為畦曰遠無仇曰近無庇里巷之衣
惟此令人流聞餘澤化其子孫惟身之祥既壽而康惟
後之祥宜熾而昌惟墓有域其藏有石刻此銘詩昭示
無極

寶月大師塔銘


君名修廣字叔微杭州錢塘人姓王氏九歲出家學佛
居州之明慶院十一歲落髮為僧景佑二年詔賜紫衣

五年又賜號寶月大師治平某年州選為管内僧正熙寧元年十月感疾癸丑會門人與常所往來學佛之人告以將終其夕沐浴更衣正坐而卒享年六十有一門人曰慈化大師了性曰崇照大師了然曰賜紫衣了蘊以明年某月某甲子為塔葬君於某縣某鄉某原君為人樂易慈祥有智識度量人不見其喜怒讀五經略知大義頗喜為詩少羸多病始學為醫既成而有疾者多歸之無貴賤貧富皆為之盡其術未嘗有所厚薄尤貧

者或資之衣食以其故自京師至於四方自公卿至於學士大夫多知其名既見皆樂從之游而鄉邑之人至於羈旅游客其歸之者無不厭其意君於接之雖勞未嘗有懈倦不欲之色於資之藥物衣食雖窮無未嘗有所計惜其應外者如此及退而處夫貧富死生之際又有所不累其心故至於不能自給而未嘗動意至於且死而未嘗變容改色噫是非可銘也歟銘曰

不以貧故累其心此學士大夫所難至於遭死生之變

而不驚又難也君之學不同而自得者則然固不可以
無傳況於名聞於世行信於人故為之書尚使長存



元豐類案卷四十四

欽定四庫全書

集部

元豐類藁卷四十五至
八

詳校官庶吉士臣張漣

檢討臣何思鈞覆勘

總校官降調編修臣倉聖脉

校對官編修臣吳錫齡

謄錄監生臣王宮

欽定四庫全書

元豐類藁卷四十五

宋 曾鞏 撰

誌銘

金華縣君曾氏墓誌銘

夫人嫁王氏為侍御史諱平妻姓曾氏泉州晉江人祖諱穆殿中丞追封魏國公考諱會尚書刑部郎中集賢殿修撰追封楚國公皆累贈太師中書令兼尚書令妣

黃氏楚國太夫人未嫁承順父母盡子道既嫁夫家貧養姑盡婦道輔其夫盡妻道夫死寓食於穎以勤儉積日大其家以誘教不倦成其子又可謂盡母道也蓋其子五人回向固同回皆有學行回有道為儒宗向回尤有文三人皆身在隱約而聲震天下於是時夫人兄魯公公亮實為宰相當國然夫人處里舍彌約未嘗以為泰及其後回向同回皆蚤世人以為難處夫人能自廣以理未嘗亂其志教養其孫至男有立女有歸熙寧之

間魯公告老以太傅侍中就第夫人少魯公一歲食其子祿皆居京師二人白首相顧怡然元豐元年春魯公薨四月丁卯夫人亦以疾終春秋七十有九夫人以夫恩封金華縣君以魯公恩賜冠帔子回忠武軍節度推官知陳州南頓縣事向峽州硤石縣主簿固大名府軍巡判官國子監主簿同陳州宛丘縣令同蔡州新蔡縣主簿女嫁太子右贊善大夫陳臻古孫五人泌汾汶沂潢汾郊社齋郎汶試將作監主簿夫人既卒之明年某

月某甲子葬穎之汝陰縣懷音鄉南高村祔御史之兆其將葬也固以狀來乞銘惟夫人為子若婦為妻若母皆盡其道於難阨流寄之中能立其家成就其子所以自處於通塞之際者無不當於理是其智術德性過人遠甚宜得銘且余實與其子遊最舊乃不辭而為銘曰
魯禹之苗氏自鄆子或言厥志有稱闕里或以孝顯於經實紀或守所聞羞踐霸軌遙遙千載歷世有聞自荆徂粵篤生夫人楚公之子魏公之孫魯公維伯御史是

嬪迺立厥家自墜而興迺教厥子自幼而成卷服貂冠
伯也在廷子也在幽碩實洪聲莫親已宗莫重夫氏兩
有其盛世誰與嬪維能既試維德寔孚尚寵爾後列銘
陰墟

壽安縣君錢氏墓誌銘

劉凝之仕既齟齬退處廬山之陽初無一畝之宅一廛
之田而凝之囂囂然樂若有餘者豈獨凝之能以義自
勝哉亦其妻能安於理不戚戚於貧賤有以相之也凝

之晚有宅於彭蠡之上有田於西澗之濱子進於朝廷
薦於鄉閭凝之夫婦康寧壽考自肆於山川之間白髮
皤然體不知駕乘之勞心不知機獲之畏世人之所慕
者無嫌焉聖人之有所不能及者獨得也其夫婦如此
可不謂賢哉熙寧九年凝之年七十有七哭其妻之喪
自為狀次其妻之世出行事來乞銘予為之因其言而
識之曰夫人姓錢氏考內殿崇班穆祖考內閣使昭晟
曾祖考宣德軍節度使同中書門下平章事湛高祖吳

越文穆王元瓘夫人色莊氣仁言動不失繩墨居族人
長幼親疎間盡其宜事夫能成其忠教子能成其孝是
皆可傳者也夫人年七十有三卒於四月之庚子而葬
於其歲某月某甲子墓在南康軍西城之某原初以凝
之恩封壽光縣君再以子恕恩封壽安縣君有子曰恕
祕書丞曰格鄉貢進士皆以文學顯於世女嫁進士徐
彥伯太子中允黃廉孫某某凝之名渙筠州某人今為
尚書屯田員外郎致仕銘曰

士不苟合安於賤貧其難其豫繇嬈有人維不終窶又
壽以康有續孔辰既庶而臧世迫而求獨優以取世懦
以處獨肆而有士也則然女實作輔考則錢媛尚配於
古

天長縣君黃氏墓誌銘

夫人姓黃氏福州福清縣人祖諱某考諱偏皆仕閩越
夫人嫁同縣林氏為殿中丞諱某之家婦尚書屯田員
外郎諱某之妻有子曰概為太常博士集賢校理有孫

八人曰希宣州涇縣主簿編校集賢院書籍曰旦明州
象山縣令曰邵杭州南新縣令曰顏許州臨川縣令曰
稽曰雄未仕也其二人早卒有魯孫十有二人曰睿處
虞虞虔虞據處其三人亦早卒夫人年七十有七治平
四年正月癸丑卒於京師之昭化坊累封嘉興天長二
縣君始殿中府君與其配福清縣太君鄭氏皆春秋高
安其鄉里不肯出屯田府君乃從事漳州泉州興化軍
踰二十年終養而後去夫人能盡其力治飲食衣服以

進及喪能盡其哀皆如其夫之志其子既就學夫人常
夜治絲枲居其旁以勉之至其後其子遂以文學名天
下既而其子不克壽屯田府君亦卒于官諸孫皆幼夫
人已老矣乃栖吳郡斥賣簪珥以經理其家絲蓄粒聚
至有田以食有宅以居平居日夜課諸孫以學有不中
程輒朴之及長遂多知名連以進士中其科涇縣復校
書集賢世其父職夫人乃顧諸孫謂曰吾始得事祖姑
今得弄曾孫遂保有汝家起于既墜吾老且死不恨矣

涇縣既服夫人之喪以其柩歸吳郡寶華山某年某月
某日附屯田府君之兆而屬余銘銘曰

女職在宮行止於柔扶微掾阨則匪我謀勢有孔棘義
不得寧任重于已振壞為興我儲我積乃續烝嘗我字
我飭乃襲印章蒼顛秀眉燕其作止其燕伊何維終受
祉莫仁且智疇濟登茲播告無極視此銘辭

仁壽縣太君吳氏墓誌銘

仁壽縣太君撫州金谿吳氏尚書都官員外郎贈尚書

刑部侍郎撫州臨川王公諱益之夫人衛尉寺丞諱用之之婦年六十有六嘉祐八年八月辛巳卒於京師十月乙酉葬於江寧府之蔣山夫人好學強記老而不倦其取舍是非有人所不能及者然好問自下於事未嘗有所專也其平生養舅姑甚孝蓋侍郎七十而少子五人吳氏出也然夫人之愛其長子甚於少子曰吾愛之甚於吾子然後家人愛之能不異於吾子也故其子孫已壯大有不知為異母者居久之二長子前死夫人已

老矣每遇其嫠婦異甚而身為字其孤兒忘其力之僊也其處內外親疎之際一主於恩有讒訕踞罵已者數困苦常置之不以動聲色亦未嘗有所含怒於後也有以窮歸已者急或分衣食不為秋毫計惜以其故至不能自給然亦未嘗不自若也其嫁三從之孤女如已女而待長子之母族如已族蓋篤行如此而天性之所有也其自奉養未嘗擇衣食其視世俗之好無足累心者方其隱約窮賸之時朝廷嘗選用其子堅讓至於數十

或謂可強起之夫人曰此非吾所以教子也卒不強之
及處顯矣其子尚有歸志而以不足於養為憂夫人曰
吾豈不安於命哉安於命者非有待於外也其子為知
制誥故事其母得封郡太君夫人不許言故卒不及封
此夫人之德見於行事之迹而余以通家故熟於耳目
者也夫人之考諱畋畋之配黃氏兩人者皆有善行鄉
里稱之而黃氏兼喜陰陽數術學故夫人亦通於其說
七子者曰安仁安道安石安國安世安禮安上安仁宣

州司戶參軍安石尚書工部郎中知制誥安世太平州
當塗縣主簿安禮大名府莘縣主簿餘未仕也女三人
長適尚書虞部員外郎沙縣張奎次適前衢州西安縣
令天長朱明之次適揚州沈季長孫男九人曰雱粵旁
旄旂防旂旂放孫女九人長適解州安邑縣主簿徐公
翊次許嫁太廟齋郎吳安持餘尚幼銘曰

嗟若人兮洵好善兮始終一德仁七子兮遺棄細故篤
九族兮脫珥推食光惠施兮以義易利能無累兮縱心

委命志彌邵兮謂宜百歲奄忽逝兮風有采蘋經所首
兮原念美實輯此辭兮庶幾德音與古對兮

壽昌縣太君許氏墓誌銘

夫人許氏蘇州吳縣人考仲容太子洗馬兄洞名能文
見國史夫人讀書知大意其兄所為文輒能成誦父母
衣食服御待之而後安既嫁惇行孝謹宜於其家其夫
為吏有名稱夫人實相之及春秋高於內外屬為高曾
輩行而慈幼字微愈久彌篤故親疎懷附無有惡斁昔

先王之治必本之家達於天下而女子言動有史以昭
勸戒後世以古為迂為政者治吏事而已女子之善既
非世教所獎成其事實亦罕發聞於後其苟如此其衰
微所以益甚則夫人之事其可使無傳也哉夫人嫁沈
氏其夫諱周太常少卿贈尚書刑部侍郎其舅諱某贈
兵部尚書杭州錢塘人夫人封六安縣君壽昌縣太君
年八十有三熙寧元年八月丁巳卒於京師二年八月
某甲子合葬杭州錢塘縣龍車原子曰披國子博士有

吏材曰括揚州司理參軍館閣校勘有文學其幼皆夫
人所自教也女二人蚤卒銘曰

生民之治必本於身教行於家餘以為人世弊俗偷恕
於在已內替常度外彊於理淑惟壽昌學與心成篤於
孝慈匪勸而能有翼於夫有迪於子尚類古人其傳以
此

德清縣君周氏墓誌銘

夫人姓周氏湖州長興人曾大父諱某大父諱某父諱

某嫁同縣陳氏為秘書省著作佐郎諱某之妻為人柔
嫻靜莊在父母家至歸於夫氏本於自脩而卒於能孚
於屬人陳氏有姒婦寡居當家事夫人常曲意下之於
事常退避不敢與姒婦以其故顧夫人甚歡而親踈觀
者莫不悅著作有田數千畝而愛士好施夫人常悉力
助之以其故至不能自給而夫人處之自若遇子之非
已出者與已子無毫髮厚薄意人以為過人而夫人若
有所不及也享年三十有五封德清縣君子曰樞為尚

書屯田員外郎曰楷曰權未仕也卒於慶歷五年之二
月辛丑葬於熙寧三年之三月庚申其墓在長興縣永
昌鄉卞山之陽銘曰

嗟淑人體明德外惟均內自克不永年隕嬪則兆親宮
藏石刻

夫人周氏墓誌銘

夫人諱琬字東玉姓周氏父兄皆舉明經夫人獨喜圖
史好為文章日夜不倦如學士大夫從其舅邢起學為

詩既嫁無舅姑順夫慈子嚴饋祀諧屬人行其素所學
皆應儀矩有詩七百篇其文靜而正柔而不屈約於言
而謹於禮者也昔先王之教非獨行於士大夫也蓋亦
有婦教焉故女子必有師傅言動必以禮養其德必以
樂歌其行勸其志與夫使之可以託微而見意必以詩
此非學不能故教成於內外而其俗易美其治易治也
茲道廢若夫人之學出於天性而言行不失法度是可
賢也已其夫來乞銘予與之親且舊故為之序而銘之

蓋夫人之王父諱協為尚書刑部郎中父約今為尚書
虞部員外郎青州益都人也夫人嫁關氏為徐州豐縣
令景仁之妻為尚書職方員外郎贈尚書都官郎中諱
魯之子婦生一男二女年二十有六卒於治平二年之
九月某甲子葬於杭州錢塘縣履泰鄉葛松原實某年
某月某甲子關氏錢塘人也銘曰

女有圖史傳於師氏其勸以樂其康以禮能此非他繇
學而已王政之興蓋自此始今孰登茲維周之媛學繇

自好終之不倦言循於矩行循於典尚配古人輝光日
遠

永安縣君謝氏墓誌銘

宋故衛尉寺丞王公諱用之之夫人尚書都官員外郎
贈尚書工部郎中諱益之母姓謝氏累封永安縣君其
卒皇祐五年之六月十四日其葬於撫州金谿縣某鄉
某原既卒之百有五十日也其子曰益曰某皆已卒
曰某曰某曰孟楚州司理參軍亦已卒其孫曰安仁宣

州司戶參軍曰安道皆已卒曰安石殿中丞通判舒州
曰沆荆南府建寧縣令曰安國曰安禮其曾孫曰某曰
某曰某其墓工部故人之子曾鞏誌之曰王氏由工部
之叔父尚書主客郎中贈太常少卿諱觀之始起家為
能吏遂追榮其父諱某為尚書職方員外郎至於工部
父子遂皆進於朝為聞人其世浸大夫人及拜其舅與
夫之榮而享其子與孫之祿其壽至於九十其卒於撫
州之臨川安於其寢余既與夫人之諸孫遊而嘗得拜

於堂上見其色和其容謹聞其言儉而勤退而聞其為
婦順為母慈知其所以享其福祿者其宜也已余嘗觀
詩人之歌其后妃至於諸侯大夫之妻內脩法度輔佐
其夫而其效之見則兔置之人至於江漢汝墳之婦女
皆承其化而篤於禮余固歎其當是之時上下之間內
外相飭何其至也如夫人之資而使出於其時則必有
歌於風而被之於無窮之事若余之鄙其亦曷能知其
所至也哉謝氏之祖曰某考曰某銘曰

士顯其施其行易知女處於私其有孰窺嚴嚴秀眉不見缺虧曷以長之眎此銘辭

永安縣君李氏墓誌銘

夫人姓李氏其先燕人而今家許州之長葛贈太子太傅諱譚之曾孫贈禮部尚書諱運之孫贈刑部尚書諱昌言之女而母晉平縣君聶氏也夫人嫁駱氏駱氏亦家許州之長葛其夫諱與京為某官檢校某官知某州享年七十有九封永安縣君有子男四人長吉逢吉元

吉皆三班奉職早卒嘉福今為右班殿直女三人亦早
卒夫人以嘉祐八年十一月丙辰卒於其家之正寢而
以熙寧二年十月葬於許州長社之舞鸞鄉白兔里祔
駱侯之塋夫人仁孝慈恕言動必擇義理事父母不違
其教事舅姑不違其志事夫順而有以相其善遇子至
於內外屬人一以恩而不違於禮初刑部之兄昌齡當
太宗真宗時輔朝政李氏族大而貴然刑部嫁女常擇
寒士而至其後多為名臣范文正公仲淹鄭文肅公或

與駱侯是也夫人之弟光祿少卿禹卿余妻父也寔葬夫人故屬余銘銘曰

性有能否行有失得一當於理士有不克淑哉夫人秉是壺彛周旋大小無過無虧貴不稱德壽則謂遐維藏在許永裕厥家

試秘書省校書郎李君墓誌銘

君諱迂字明遠姓李氏為人孝友慈恕讀書務大旨生五代之際再試明經不合退居楚丘有田百餘頃皆推

與其族人獨留五頃而已曰無令子孫以財自累也宋
初秘書監彭君薦其行義詔以為試秘書省校書郎而
君終不肯強起淳化三年壬辰九月二十一日以疾卒
於家享年八十有四維李氏遠出於臯陶而其後李耳
之孫曇為秦司徒曇子璣璣子牧事趙始家趙郡牧子
汨汨子左車於趙號廣武君廣武君子遐涿郡太守遐
子岳諫議大夫岳子秉潁川太守又徙家潁川秉七世
子膺河南尹膺子瑾復家趙瑾曾孫楷晉治書侍御史

有子五人曰輯晃芬勁獻以所居巷東西自別故勁稱西祖勁子隆後魏阜城令隆後九世棲筠唐御史大夫贊皇文獻公文獻公子吉甫相憲宗吉甫子德脩楚州刺史德裕相文宗武宗楚州子煜宋州宋城令君曾祖也又徙家宋之楚丘故今為楚丘人宋城子確萊州膠水令君祖也膠水子譚磁州邯鄲令君考也邯鄲之少子運為太常少卿有子曰昌齡太宗真宗時為尚書戶部侍郎參知政事故膠水贈太子少保邯鄲贈太子少

傅君娶丁氏王氏王氏有子曰昌震為建州松溪令贈
尚書駕部郎中駕部有子曰漢卿今為諸王府侍講尚
書虞部員外郎虞部有子曰彥龍彥龍復有子四人矣
君卒後七十四年治平三年丙午四月某甲子虞部葬
君於開封府開封縣保安鄉永寧里之原以王夫人從
銘曰不累於物全吾質兮不羈於世遂吾志兮作宅新
原維孝孫兮納銘幽扃永淑聲兮

試秘書省校書郎李君妻太原王氏墓誌銘

夫人姓王氏太原人嫁趙郡李氏為磁州邯鄲令贈太子少傅諱譚之冢婦試秘書省校書郎諱迂之妻為人明識強記博覽圖籍子孫受學皆自為先生其行仁孝慈恕始於為女中於為婦終於為母無不盡其道享年八十大中祥符三年庚戌十二月己巳卒於虢州廬氏縣其子之官舍子曰昌震建州松溪令贈尚書駕部郎中駕部子曰漢卿令為諸王府侍講尚書虞部員外郎虞部嘗為李氏九世譜其博而詳多夫人之所為言也

治平三年丙午四月丁酉虞部以夫人之喪從校書君
葬於開封府開封縣保安鄉永寧里之原銘曰

嗚呼夫人既有其質又賜爾力古有遺辭罔不采獲克
踐以躬亦畀爾息維瘞有銘尚以載德

池州貴池縣主簿沈君夫人元氏墓誌銘

夫人姓元氏錢塘人祖諱德昭事吳越國王錢氏宋興
贈太保考諱好文尚書比部員外郎贈某官嫁吳興沈
氏其舅為尚書屯田郎中諱某一作玉其夫為池州貴池

縣主簿諱播夫人在父母家內外上下親疎長幼皆宜之年十有七而嫁既嫁如在父母家時貴池君早世無兄弟太夫人春秋高諸子尚幼夫人年三十餘於羈旅單獨之中闔門事姑能盡其孝教養諸子至其後皆為成材能世其先人方其憂戚難阨之時人恐其不能堪夫人既奮厲經理以保有其家又退能自安不亂其志是人之所難而其後世之不可以無述者也夫人年七十以治平二年某月某日卒卒之若干日葬真州揚子

縣甘泉鄉三城里北山之原子男四人皆進士曰伯莊
未仕曰季長越州司法參軍曰叔通秘書省著作佐郎
曰次通試將作監主簿貴池君於先人為同年友而諸
子又與余遊故為銘銘曰

元出於危於東得姓有保有郎重世之盛允淑夫人集
享家慶來嬪沈宗作德維令處平不盈在險能正姑曰
微婦余老誰據子曰微母余幼誰怙自振單弱卒持艱
急老肆而安幼強以立實保沈宗自替而昌有烈如此

何愧丞嘗後世原美孰可無述刻辭幽宮庶幾不沒

雙君夫人邢氏墓誌銘

夫人邢氏無為軍巢人也嫁為贈大理寺丞姓雙氏諱華之妻封萬年縣太君子男三人曰漸為尚書屯田員外郎通判吉州軍州事餘未名皆早夭夫人年八十有六嘉祐四年九月二十七日卒於宣州之官舍六年十二月二十七日葬於無為軍巢縣無為鄉惲良里之原方大理府君之在隱約屯田始就書學夫人能經理其

家使無內憂以卒就其志及屯田有列於朝夫人食其
祿養就封大縣實受成報天之施與善人豈非信哉夫
人之在疾也屯田之配長壽縣君陳氏共養營救有過
人之行州上其事天子聞而嘉之勅州使致粟帛賜其
家於是人知夫人之善不獨能成其子又能化其家也

銘曰

允淑夫人秉是壺彛有韓車服維寵嘉之葬其卜壤其
吉在斯推求美實眎此銘辭

旌德縣太君薛氏墓誌銘

夫人姓薛氏累封旌德縣太君為故太子右清道率府副率致仕贈右監門衛將軍姓段氏諱某之妻今提點江南東路刑獄公事禮賓副使名某之母某州某縣人也大父諱某當吳越錢忠懿王時娶王女為王國官父諱某祥符初為東頭供奉官供奉常將屯宮門而監門之父右班殿直諱某者屯三陽二人者以意氣喜相得也遂以夫人歸段氏夫人性柔淑能和其屬人自珮服

櫛珥凡資已者常出於儉而有餘好施雖盡費不以為侈也生男一人禮賓也女二人長適開封黃思問次適吳郡潘孝孫皆進士夫人年四十有三大中祥符七年五月某甲子以疾卒於京師之敦教坊某年某月某甲子祔其夫人柩葬於某州之某縣某鄉某所之原前葬禮賓稱夫人之行與其世序封號之詳託銘於南豐曾鞏為述而銘之曰

約乎已厚乎人發其積在子孫韡兮翟列封君砧兮石琢銘文

永興尉章佑妻夫人張氏墓誌銘

夫人姓張氏建安人父諱士龍舉進士嫁同郡章氏為永興尉佑之妻所出三男四女曰造适述皆舉進士造及第為清海軍節度掌書記女嫁俞瑾徐立之陳震亦皆舉進士其一蚤死初永興府君起家二十年止於為尉及死三男尚幼造既起又蚤死已而适亦死夫人維能忘其貧所以使其夫能屈於小官而說維能務其生所以使其子能安於幼學而成維能順其性所以居流

離顛頓之間而不為悲哀愁憂亂其志也其為人卑極
於順其為人尊極於慈推於其疏宗遠屬之間極於愛
男之有不能葬者為葬之女之有不能嫁者為嫁之忘
其力之匱而為之也此皆古今學士儒者所難而女子
之善能如此此非可銘者歟嘉祐二年十一月三十日
卒於洪州之私第即以其年十二月十八日葬於洪州
某州之某鄉某原銘曰

彼以吾窮我以吾仁二者皆天吾樂而因壽止七十豈

不得年維其有之愈遠彌傳

福昌縣君傅氏墓誌銘

福昌縣君姓傅氏會稽人尚書職方員外郎霖之女同
郡尚書職方員外郎闢公魯之妻後闢公五年至和三
年二月丙申卒於家年六十有四子男八人景棻景元
景仁希聲杞景山景宣景良女一人景華嫁著作佐郎
史叔軻福昌君在家為父母所器異既嫁而夫屬無退
言布衣惡食身治細微故闢公之祿及其䟽昆弟姊妹

之孤其事關公正以從其教子慈以肅關公起進士為
郎為池臺兩州年八十以歸曰吾少得盡力於官而老
得自休於家不以家事累吾志者以有夫人也八子學
行脩立景芬希聲杞同時皆中進士夫人之卒景芬為
江陰尉希聲寶應尉杞和州判官景元亦以父恩為廣
德尉皆能其官景仁而下皆有聞於人寔受教於夫人
也始關公既貧而孤其仕與婚又皆後至其終有百口
為大家福昌君維厚勤薄養所以經理其微維可否以

明行止以公善訓能使誠恕愛人所以使其家有節法以有其成也某月甲子從葬錢塘之某原其子來屬以銘景宣子妹婿也宜為銘其辭曰

闕氏爰昔始如萌芽臺州奮拔垂寔敷華進勤退佚不卹其家繇嬖有人作其內治孰致其休不懈於勸孰致其隆不簡於細高明純約坦坦其夷無怨無疵小大化之有容有則婦子順之公為朝老子宦以成象衣華軼我止我行魏冠文笏我翼我承公曰微子誰據誰依子

曰徵母莫濟登茲云誰無母其孰無妻為妻為母如我
誰亢生雖有止存也其長鴻鴻號聲垂此銘章

沈氏夫人墓誌銘

夫人姓沈氏其先家於越之會稽曾祖仁諒令海州之
朐山徙家於和州歷陽故今為歷陽人祖平贈尚書刑
部侍郎父立今為右諫議大夫判都水監母馮氏濮陽
縣君董氏仁壽郡君夫人年二十有二嫁揚州進士朱
延之有子三人寅萬廣女五人尚幼夫人年四十有五

卒於熙寧元年十一月之庚辰葬於某年某月之某甲
子其墓在揚州天長之秦蘭里夫人為人柔閒靜專事
父母盡子道事姑長興縣太君賈氏盡婦道事夫盡妻
道為母及與內外屬人接一皆盡其道故其處也愛於
其家其嫁也夫之屬人上下遠近皆愛之而其歿也哭
之者皆哀是不宜無銘而朱君余舅也屬余銘銘曰
媛維沈女經德以身柔嫗靜簡一作間孚於屬人維祉在
後有子詵詵琢詩告美愈遠彌新

壽安縣太君張氏墓誌銘

夫人姓張氏濟州鉅野人嫁為同郡尚書駕部員外郎
贈開府儀同三司吏部尚書晁公諱遘之夫人而為贈
太傅諱佺之子婦有子男四人曰宗曜進士曰宗裕光
祿少卿曰宗願真州軍事推官曰宗懿尚書司門員外
郎女一人嫁進士桑況夫人初封清河縣君累封清河
壽安縣太君年八十有七卒於熙寧二年之十一月某
甲子葬於某年之某月某甲子其墓在開封府祥符縣

旌孝鄉合儀同之兆卒時子宗曜宗願皆已死既而光祿居喪以疾亦死而諸孫男女凡三十人男多已仕女多已嫁矣夫人為人仁厚莊靜自為女及既嫁處內外親尊卑長幼親疎之際無不當於禮而恩稱之其長者皆以為善事我而平居為等夷及少者莫不願以為歸也雖老未嘗懈而雖疾未嘗有惰容維其初終受養收封既壽而康實備成福可謂盛矣余之亡妻於夫人之孫女為第三而光祿之長女也知夫人之行為尤詳故

為之銘曰

女婉張氏處躬以厚來嬪晁宗太傅維舅儀同維夫卿
士維子有孫詵詵亦紹厥美累封備養維康以壽德則
既成福亦多有納詩新藏尚告爾後

元豐類藁卷四十五

欽定四庫全書

元豐類藁卷四十六

宋 曾鞏 撰

誌銘

亡兄墓誌銘

君姓曾氏諱晔字叔茂有智策能辨說其貫穿反復人莫有能屈之者身窮為生事或毛密應之無留而讀書理筆墨交賓客又思事未至當何如亦不廢也歡愉憂

悲疾病行役寢食之間書未嘗去目故自上古以來至今聖賢百氏騷人材士之作訓教警戒辨議識述下至浮夸詭異之文章莫不皆熟而於治亂興亡得失是非之際莫不能議焉其文章尤宏贍瓌麗可喜三代遠矣漢以來世有成事業就功名之時則賢臣謀士材技之人同世並出常若有餘至時或無所用之則士雖往往有紀而亦不俱見於世蓋陞窮頓委於巖牆閭巷之中者豈少哉如君之材知辨博又其學如此使得用其意

於事其施設必有異焉然卒不克見於世蓋亦豈非其
命也夫君年四十有五皇祐五年以進士試於廷不中
得疾歸卒江州祖諱某尚書戶部郎中贈右諫議大夫
考諱某故太常博士娶李氏子曰覺曰黌女二人卒之
歲十二月某日葬建昌軍南豐縣之某鄉某原某里也
弟鞏為其銘曰

世或須人中士為材有非其理聖不能諧故君之學於
已為足而材與世為乖刻銘幽石維以告哀

故高郵主簿朱君墓誌銘

君諱某字齊卿姓朱氏其先家于彭城五代之亂徙于淮南今為淮南人曾祖某不仕祖某贈刑部尚書父某贈殿中丞君嘗試于秘書省校書郎蘇州之長洲尉高郵軍之高郵主簿以卒卒時乾興元年六月十九日也後卒之若干年其子象之東之升之延之奉君之喪葬天長縣之秦蘭里於是時象之某官東之某官以材名餘皆為士某官以書命輦曰子其為我銘之而以狀言

公之為人有智計喜施與少從師學問已而捨學業其
家家之食口數百仰於君君能資之凡出乎衣食嫁娶
皆有餘法殿中之第工部侍郎異初舉進士數困欲不
復往君勸之曰第行無以廢為念故侍郎得曲就其志
至為達官大其家後卒官君既居官以材稱其為身務
於廉臨獄訟務為恕母某氏旌德縣太君娶耿氏又娶
賈氏女歸太常博士吳祥柳州馬平知縣陳許池州推
官李樞其季歸于曾氏某之先君博士也舅氏寔命輩

銘其敢辭銘曰

推心於家其愛已孚用力於官蓋以其餘得官於晚壽
五十四故不大顯以極其志

江都縣主簿王君夫人曾氏墓誌

試校書郎揚州江都縣主簿王無咎妻曾氏建昌南豐
人先君博士第二女也孝愛聰明能讀書言古今知婦
人法度之事巧鍼縷刀尺經手皆絕倫先君選其婿於
里中以歸王氏王氏家故貧曾氏為冢婦而其姑蚤世

獨任家政能精力躬勞苦理細微隨先後緩急為搏節
各有條序有事於時節朝夕共賓祭奉養撫其門內皆
不失所時將以恭嚴誠順能得其屬人其舅喜曰吾不
以家為卹矣其夫歎曰我能一意自肆於官學不以私
累其志曾氏助我也生二女年三十有三嘉祐四年五
月三日以疾卒十二月葬建昌南城曾大考尚書水部
員外郎諱仁旺大考右諫議大夫諱致堯先君太常博
士諱易占將葬江都告其兄輩使誌其墓天乎吾哭伯

姊姑踰替又哭吾妹而誌之其可哀也已其可哀也已

鄆州平陰縣主簿闕君妻曾氏墓表

鄆州平陰縣主簿闕君景暉妻姓曾氏建昌南豐人尚書水部員外郎諱某之曾孫尚書戶部郎中直史館贈右諫議大夫諱某之孫太常博士諱某之女而輦之長妹也始吾妹為兒時育於祖夫人已不好戲弄及長喜讀書於女工之事不教而自能為人進退容止皆有法度人罕見其喜愠之色內外屬皆嚴重之性儉素於紛

華盛麗之際無所好其在父母及夫之家或蔬食不給處之晏然其推之於人雖資身之物不為秋毫顧惜計也其治女事尤勤雖勞不厭治家人之業雖煩細皆有條理養父母姑舅皆至孝姑久疾晝夜候省未嘗須臾去其側藥食非親調不以進其於內外屬親疏皆盡恩意人皆以謂宜富貴壽考而卒不得至其所宜有嗚呼其豈非命也歟嘉祐二年輦與二弟得進士第南歸而吾妹從景暉視余於淮南至真州得疾七月某日卒於

余之舟中年三十有二矣有女一人曰某始五歲景暉以其喪歸六年十月丁酉葬於杭州錢塘縣履泰鄉龍井原景暉之王考諱某考諱某皆尚書職方員外郎而越之山陰人也吾妹既歿之六年景暉得進士第於是時余校史館書籍皆會京師而余於其間再哭妹又哭女與哭妻憂患之接於余者可謂多矣景暉之始葬吾妹也來請銘不及余與之皆恨焉而其會京師以歸也乃為之書吾妹之事以遺之而使表之於其墓上

故太常博士吳君墓碣

君諱祥字某始吳氏事宋為太常博士年六十二某年某月某日以官卒于家卒之若干日葬真州揚子縣之某鄉某原初君從進士試屢不中年四十餘始中第為吉州軍事推官歸以選為開封府開封縣丞大臣稱其材遂為祕書省著作佐郎知考城縣又知河中府之龍門縣再遷為博士知蘄州之蘄水縣父喪除朝京師疾作遂求歸真州真州君家也初君之屢斥於進士也既

自力學問充其業又率其弟務刻苦養其親入其門內
尊安其卑卑慕其尊一時皆稱之及從事於吉州弟已
死君夫婦痛自節衣食遂能嫁其孤女若干人皆不失
所時其在開封衣食常不自足而親戚舊故之至京師
者多以君為歸其喪父也以家之有無葬故葬不緩親
戚或憂其貧欲出錢為基址謂君一強可以取其贏君
歎曰吾不敏既位於朝貧吾素也喪乃欲為利乎平居
恂恂不與犯者校及其自守人亦不能移也官歸常儻

屋以居既卒幾不能葬曾大父某大父某父某以君之恩為大理評事妣某氏某縣太君太君之喪君致其哀有過人者妻朱氏某縣君余姨也有助於君子曰某女嫁亳州觀察推官張天經既葬某為碣於墓而與天經來乙銘於輦天經以材名人皆曰其尚能存君之家者銘曰

維吾先君太王之嫡禪聖圖民於東竄跡其後孔蕃以國為氏君紹厥宗其德則類儉著於家勤著于身不苟

其羸卒死於貧維時之人命士大夫縞冠素蓋爭利於塗曾不君慕顧或笑之非彼可議維世足歎較于銘章君有則多以遺其孥非厚如何

知處州青田縣朱君夫人戴氏墓誌銘

知處州青田縣事天長朱君諱某之夫人曰高郵戴氏年七十有七治平元年九月庚午以疾卒于楚州監倉之官舍某年某月某甲子葬於天長之某鄉某原夫人之考諱奎娶徐氏女夫婦皆有善行聞於其鄉夫人受

教於始筭從事於既嫁少而行修於身老而教行於家
故父母曰不遺吾憂舅姑曰能順吾志夫受其助子賴
以成其平居深靜有儀法不妄笑言就之色莊而氣仁
居貧自薄衣食而厚於施與屬人之孤女為收嫁者蓋
二人云既老矣女事不廢而婦容益恭雖少者有不及
也有子四人曰某曰某曰某早卒某州錄事叅軍監
楚州裝卸米倉某衢州西安縣令皆及進士第好古而
有文夫人於某外叔祖母也故舅氏屬以銘銘曰

淑哉戴氏青田之助允直且仁蓄德於身為下肅祇為
上惠慈安意處貧薄已裕人其承有子以文起仕秀髮
垂領享有多慶卜壤之良乃兆新堂刻此幽文美實長
存

亡姪韶州軍事判官墓誌銘

覺姓曾氏吾兄三子也吾先人六子吾兄諱華為最長
有材而不試以歿覺自少則勵志力學問知道理善於
屬文及長慨然慕有為於世不肯碌碌為人恭謹循循

寡言治平二年及進士第為吉州司法叅軍有能吏名
用薦者為韶州軍事判官行至虔州得疾卒於驛舍熙
寧三年十一月己丑日也年三十有七覺字道濟建昌
軍南豐人高皇考諱致堯太常博士曾皇考諱易占尚
書戶部郎中直史館贈右諫議大夫覺母李氏妻鄧氏
夏氏范氏有子修偃熙寧四年八月壬申葬於南豐龍
池鄉之源頭吾哀其若將有成也而止於斯故為銘其
墓曰

德累則厚方濟而隕材引則達未試而泯志氣不獲誰云非閔墓石有文尚永來信

光祿少卿晁公墓誌銘

公姓晁氏其先家濟州之鉅野今為開封祥符人皇考諱邁尚書駕部員外郎贈開府儀同三司吏部尚書皇祖佺贈太傅皇曾祖諱憲贈某官公諱宗恪字世恭少以世父太子少保贈某官謚文元諱迴恩補將作監簿十四遷至光祿少卿歷監單州應天府酒稅知蘇州之

常熟婺州之蘭溪縣事通判安州杭州事知通州虔州
提點廣南東路刑獄公事又知信州泉州享年六十有
三熙寧二年某月某甲子卒於官四年某月某甲子與
其夫人某縣君閭邱氏合葬於杭州江都縣之廣陵鄉
公為人樂易慈恕寡言笑人不見其喜怒遇事果於有
為人亦罕能及者其為常熟修學校理溝防人賴其利
為蘭溪繩姦字窮境內和洽通判安州安州政待公而
決通判杭州州將矜己自肆上下莫能變公徐與之論

可否語平而氣和將畏且從也繇是上下倚公以治至今杭人稱之其為虔州州近鹽多盜與訟公至修弛廢督姦彊威信盛行盜不敢發而獄無繫囚及在廣南其用法常寬而欲人自避曰治有先後緩急者謂此也其視部吏孜孜恐失一善而惡人亦莫敢犯公法其為通判如廣南為信州泉州如虔州所至人皆安公之政而去常思之蓋公之行已居官而見於事者如此而其大抵則於仁厚最隆也母張氏壽安縣太君子男二人曰

仲景海州司理叅軍曰仲孺試將作監主簿孫男三人
曰端復曰端儼皆太廟齋郎曰某未仕也女六人長適
太常博士集賢校理曾鞏銘公墓者也次適某官劉某
某官高元振某官燕若濟今存惟燕氏婦餘早世閭邱
夫人為身治家皆應儀度卒於公歿之明年某月某甲
子公歿家無餘財而仲景仲孺皆謹厚自刻勵能世其
先人於是又知公之教行於其家也銘曰

晁世來西大有文元有卿有公繼屬綿綿曰卿謂誰時

維光祿作其德音先於外服其光伊何有善自身匪飾
匪雕璞玉之純治有恩威時其張弛彼畏此懷吾寧一
理于虔于泉于嶺之南里安戶擾罔有不咸宜壽而昌
胡不百齡尚茲介祉維後之成

夫人曾氏墓誌銘

夫人吾從兄女也姓曾氏沈靜謹約不妄笑言遇人一
以恕於其內外屬之間孝友慈順無不當於理故與之
處者皆愛哭其死者皆哀嗚呼為女如是足以知其賢

又足以知吾之祖考以來教行於其家也夫人考諱某
皇考諱某尚書戶部郎中直史館贈右諫議大夫曾王
考諱某尚書水部員外郎建昌軍南豐人夫人嫁為同
縣朱君某之妻有子曰軾曰某軾以文行稱於鄉有孫
曰京曰彥京為真州司法叅軍亳州教授夫人享年若
干某年某月某甲子卒於寢某年某月某甲子葬於南
豐之某鄉某原將葬軾以書來請銘余曰銘莫如余宜
為迺為其辭曰

女德在幽而始人倫詩有顯揚以立生民尚類于古淑
為夫人壺有彝則仔肩以身曾不蕃寵畀其子孫曾不
遐年善則長存維仲薦美列辭墓門

天長朱君墓誌銘

君姓朱氏諱延之字某其先彭城人今家於揚州之天
長縣曾祖某贈尚書右僕射祖某贈尚書工部侍郎考
某贈太子中舍母賈氏某縣太君君年若干卒於熙寧
六年六月之丙申葬於某年某月之某甲子其墓在天

長之同人鄉秦蘭里君聰明敏悟少力學問為文章數就進士試不合乃嘆曰與其屈於人孰若肆吾志哉因不復言仕方是時朱氏世以仕宦顯於淮南君居其家尤孝謹慈良然與人非其意不肯苟合既果於自為而其治見於家者規畫纖悉備具推之知其可任以事然卒於無所遇君亦未嘗不自得也君少孤養母母之父死歲久其喪寓於遠貧不能歸也君居窮經營卒能使之返葬及晚而饒財又能樂賑施人以此多君也君娶

沈氏諫議大夫立之女早卒再娶王氏殿中承鼎臣之
女子男四人寅萬廣寓皆有學行女五人許嫁進士滿
希遠太廟齋郎馬某餘尚幼君余舅也故為之銘其墓
其辭曰

勢不云泰志則非屯彼穀之丹豈易吾仁廩有餘粟及
里與隣藏有圖書遺其子孫已則無憾尚畀後人識美
幽堂日遠彌新

祕書省著作佐郎致仕曾君墓誌銘

君姓曾氏諱庠字明升建昌軍南豐縣人曾祖諱某尚書水部員外郎祖諱某尚書戶部郎中直史館贈右諫議大夫考諱某舒州軍事推官君進士及第歷邵州司理叅軍用薦者為衡州常寧縣令福州福清縣丞以疾自陳遷祕書省著作佐郎致仕卒於熙寧九年十月某甲子年五十有九以其年十一月某甲子葬南豐龍池鄉之原頭母吳氏妻黃氏朱氏有子曰擴曰某曰某女四人君少孤自感勵好學能文章為人聰明敏達喜事

有大志不肯少屈為吏以材稱治獄能盡其情為令丞
易敝興壞綱紀具修吏不敢犯而民安之也有聲顯聞
薦者自許得人不幸不壽不克盡其用將葬擴來告曰
願有紀也迺為其銘曰

發其華見於文收其實見於事于其小綽有聞于其卓
屈不試尚不沒慰後昆矢以辭列幽隧

亡妻宜興縣君文柔晁氏墓誌銘

文柔姓晁氏諱德儀字文柔年十有八嫁余余時苦貧

食口衆文柔食菲衣敝自若也事姑遇內外屬人無長少遠近各盡其意仁孝慈恕人有所不能及於櫛珥衣服親屬人所無輒推與之不待已足於燕私未嘗見其情容於與人居未嘗見其喜愠折意降色約己以法度學士大夫有所不能也為人聰明於事迎見立解無不盡其理其槩可見者如此蓋天畀之德而天其年遺以相余而奪之蚤余不知其所以而又不自知其哭之之慟也文柔以嘉祐七年二月甲子卒於京師年二十有

六余時校史館書熙寧二年追封宜興縣君十年二月
庚申葬於建昌軍南豐縣龍池鄉之原頭余時為洪州
文柔有子男曰綰太廟齋郎曰綜未仕也女慶老三歲
而死晁氏世家澶州清豐縣今為開封府祥符縣人文
柔曾祖佺贈太師中書令祖邁尚書駕部員外郎贈開
府儀同三司吏部尚書考宗恪光祿少卿余南豐曾鞏
子固也銘曰

人孰不貴子逢其窮世誰不壽子罹其凶維德日躋生

不見其止維聲日遠歿不見其終子能自得懟者在人
遺以輔余曾不逡巡歲云其逝予悲孔新其孰昭之琢
此幽珉

亡弟湘潭縣主簿子翊墓誌銘

熙寧十年春予蒙恩予告葬其弟子翊於南豐維子翊
姓曾氏諱宰字子翊世魯人今家建昌軍之南豐子翊
少力學六藝百子史氏記鍾律地理傳注箋疏史篇文
字目覽口誦手抄日嘗數千言手抄書連榻累筒不能

容於其是非治亂之意既已通至於法制度數造物立
器解名釋象聲音訓詁纖息委曲貫穿旁羅無不極其
說且老未嘗易意其為文馳騁反復能傳其學為人質
直孝弟抑畏小心少年飲酒歌呼饒樂放縱之事未嘗
一接焉其學行如此於世用宜如何也然位不過主簿
壽止於四十七其非可哀也夫子翊嘉祐六年進士及
第歷舒州司戶叅軍潭州湘潭縣主簿所居官理其去
人思之其學於古者蓋未嘗試也有子經綬純約女適

饒州軍事判官曹唐弼次尚幼也曾祖諱某尚書水部
員外郎祖諱某尚書戶部郎中直史館贈右諫議大夫
考諱某太常博士贈尚書都官員外郎先太夫人吳氏
吳興郡太君今太夫人朱氏南昌郡太君妻張氏子翊
熙寧元年四月乙巳卒於湘潭十年三月庚申葬於南
豐龍池鄉之原頭銘曰

好學不倦以及其詳力行不已亦蹈其常見於遺文華
衮之章舍其淳德璞玉之良于舒于潭非試其有方疆

而盡又奪其壽畜而不施則既已矣潛而益明尚監于此

曾氏女墓誌銘

先君太常博士贈尚書都官員外郎曾公之第八女諱德耀字淑明生而慧淑於女工不學而能於孝愛天成也生二十歲許嫁大理寺丞王幾行有日矣嘉祐六年九月戊寅以疾卒於京師熙寧十年三月壬申葬南豐之原頭其兄輩為銘曰

孰訛爾質而伐其成尚千萬年爾室之寧

二女墓誌銘

南豐曾氏葬其二女其父鞏為誌曰予校書史館凡九年喪女弟喪妻晁氏及二女余窮居京師無上下之交而悲哀之數如此二女曰慶老吾妻晁氏出也生三歲而天寶嘉祐六年十一月壬申方是時吾妻晁氏病已革慶老疾未作之夕省其母勉勵如成人中夕而疾作遂不救蓋若與其母訣也曰興老吾繼室李氏出也卒

時始二歲實治平三年九月甲寅是時余方鎖宿景德寺試國子監進士不得視其疾臨其死也二女生而值予之窮多故其不幸又天以死所謂命非邪熙寧十年予為洪州始以三月庚申瘞二女於南豐之原頭同穴慶老在右興老在左是為誌

仙源縣君曾氏墓誌銘

吾妹十人其一蚤夭吾既孤而貧有妹九人皆未嫁大懼失其時又懼不得其所歸賴先人遺休嫁之皆以時

所嫁之者皆良士謂宜皆壽而昌以延光榮于父母家也而十餘年間死者四人先人之盛德也吾妹之懿也曾不章顯於世而天吾故不知夫哭之之慟也諱德操字淑文者吾之第九妹也嫁江都王氏為殿中丞贈尚書屯田員外郎諱某之子婦殿中丞幾之妻封仙源郡君為人柔嫺靜顓動止以儀度平居溫溫一言笑不妄也與人羣居自處者常取其後與人共衣食自與者常取其薄王氏故貧垢衣菲食未嘗以為歎恭大慈小輔

其夫以義無不得其宜者不幸年三十有一以死有子男二人曰某曰某女二人皆幼也曾氏其先魯人今家建昌軍之南豐吾妹為尚書戶部郎中直史館贈右諫議大夫諱某之孫女太常博士贈尚書都官郎中諱某之女卒於熙寧七年三月庚子葬於揚州江都縣東興鄉元豐四年某月某甲子也銘曰

既艱其生又不介之壽維篤于仁尚克臧厥後

元豐類藁卷四十六